

Saturnus in decima retrogradus in Geminis, coniunctus Marti, matrem natī, ex ruina morituram significat. Expertum est, matrem ex ruina mortuam cum tribus paruulis filijs, quia fuit prope oppositum Saturni & Mercurij.

Saturnus patris significator, si fuerit in Leone, meliorationem status, & ipsius prosperitatem significat.

Saturnus ascendens post Lunam, damnat matris uirtutem.

Saturni radius si prius peruenerit ad partem patris quam matris, pater prius interibit. Si ad partem matris, mater prior obibit mortem. Similiter præmoriatur illi alter parentum, cuius pars fuerit sub terra.

Si Saturnus in quarta, in domo uel exaltatione Iouis reperiatur, separabit se natus à parentibus.

Saturnus infortunans Solem, mortem patri ex febre, melancholia, uel ex malis nociuis humoribus adfert. Si uero Mars Solem infortunauerit, morietur pater morte subitanea. Sed natus erit morbosus in oculis.

Saturnus in medio cœli in nocturna genitura, uel in loco partis fortunæ, uel in aliquo bono loco, significat patrem natī fortunatum & diuitem.

Saturnus in termino & aspectu bono Solis, parentes natī inuenient bonum & proficient.

Saturnus & Mars post Solem euntes, uel aspicientes eum quadrato uel opposito, pater natī habebit ægrotudines chronicas & fortes.

Infortunæ ambæ si aspexerint locum coniunctionis uel oppositionis, & ipsum fortunæ non aspexerint significat malam mortem parentibus. Et quando erit aspectus coniunctionis, significat mortem patris. Si præuentionis, mortem matris.

Saturnus & Mars in quarta uel ipsam aspicientes, significant mortem patris ab apostemate.

Si Sol in undecima solus collocetur, parentes habebunt magnam fortunam, ipse autem habebit nomen magnū in terris longinquis, & erit fœlix in operibus suis.

Vnus malorum in domo Solis in diurna uel nocturna natiuitate, damnabit patrem in oculis, uel in quantitate uitæ. Expertum est.

Si Iupiter aut Saturnus in quarta, & sol in eorum quadrato extiterit, dic natī patrem seruum fuisse. Idem erit, si Venus in quarta fuerit, & Sol & Mars in tertia.

Mars ascendens post solem, damnat uirtutē patris & malę mortis facit indicium.

Si Mars supra patris significatorem eleuatus fuerit, uel quod significatorem sequatur, pronuncia paucitatem uitæ parentum.

Si Mars ex diametro Venerem aspexerit in occidente locatam, id est occidentalem, erit matris mors per febres, aut uisus debilitatem.

Mars in die, & Saturnus in nocte, si luminaria aspexerint ex signis eorum naturæ contrarijs, sine beneuolarum stellarum aspectu, parentes filium abhorrebunt. Si Solem, pater. Si Lunam, mater.

Mars in tertia, sexta, octaua, aut duodecima cum Saturni aspectu, patri malę mortis notat exitum.

Si Mars aspicit Solem & Mercurium inimicę, timeat pater, ne fulmine moriatur. Eodem modo iudica de matre per significatores eius.

Mars in angulo aspiciens malignę Venerem aut Lunam, aut ambos, malam fortunam, & breuem uitam matri minatur.

Si Mars in domo Solis fuerit, mors subita patris significatur, & si fuerit de nocte, uiuet parum.

Mars in domo Lunę, mors matris.

Si Mars aspicit Solem de Ascendente in diurna genitura, non aspicientibus fortunis Solem, mala morte parentes peribunt.

Venus in octaua in Tauro uel Libra, & Mars cum Luna in occasu in suis finibus uel domicilio, matrem natī gladio perimit.

Si Ve